

Convenio entre a Consellería de Cultura, Educación e Ordenación Universitaria e as empresas Lonza Biologics Porriño S.L. e CZ Veterinaria S.A., para a implantación dun sistema de formación profesional dual polo réxime de bolsas

Santiago de Compostela, 8 de xuño de dous mil dezaseis

REUNIDOS

Dunha parte, don Román Rodríguez González, conselleiro de Cultura, Educación e Ordenación Universitaria da Xunta de Galicia, en representación desta consellería e de conformidade coas atribucións conferidas no artigo 34.1 da Lei 1/1983, do 22 de febreiro, de normas reguladoras da Xunta e da súa Presidencia.

Doutra dona _____, en nome e representación da empresa “Lonza Biologics Porriño S.L.” como apoderada da mesma, segundo consta no poder outorgado ante o notario don _____, con data 13 de xullo de 2007 e número de protocolo 1632.

E doutra don _____, en nome e representación da empresa “CZ Veterinaria S.A.” como Director Xeral da mesma, segundo consta no poder outorgado ante a notaria doña _____, con data 10 de novembro de 2009 e número de protocolo 1985.

Interveñen en función dos seus respectivos cargos e no exercicio das facultades que para convir, en nome das entidades que representan, teñen conferidas

EXPOÑEN

1º. Que a Lei orgánica 2/2006, do 3 de maio, de educación, determina no artigo 39 que a formación profesional no sistema educativo ten por finalidade preparar o alumnado para a actividade nun

campo profesional e facilitar a súa adaptación ás modificacións laborais que se poden producir ao longo da súa vida, contribuír ao seu desenvolvemento persoal e ao exercicio dunha cidadanía democrática, e permitir a súa progresión no sistema educativo e no sistema de formación profesional para o emprego, así como a aprendizaxe ao longo da vida.

2º. Que a Lei orgánica 2/2006, do 3 de maio, de educación, determina no artigo 42 bis que a formación profesional dual do sistema educativo español é o conxunto de accións e iniciativas formativas que, en corresponsabilidade coas empresas, teñen por obxecto a cualificación profesional das persoas, harmonizando os procesos de ensino e aprendizaxe entre os centros educativos e os centros de traballo.

3º. Que a Lei orgánica 5/2002, do 19 de xuño, das cualificacións e da formación profesional, especifica nos artigos 6 e 11.3 que a colaboración das empresas no desenvolvemento do Sistema Nacional de Cualificacións e Formación Profesional se desenvolverá, entre outros ámbitos, mediante a súa participación na formación do alumnado nos centros de traballo, favorecendo a realización de prácticas profesionais dos alumnos e das alumnas nas empresas e noutras entidades, e deberán establecerse os mecanismos axeitados para que a formación que reciba financiamento público poida ofrecerse por centros ou directamente polas empresas, mediante concertos, convenios, subvencións ou outros procedementos.

4º. Que a disposición adicional segunda do Decreto 114/2010, do 1 de xullo, polo que se establece a ordenación xeral da formación profesional do sistema educativo, determina que a consellería con competencias en materia de educación promoverá a colaboración coas empresas e entidades empresariais e, en particular, coas máis implicadas en sectores clave da economía galega e as relacionadas cos sectores emerxentes. Esta colaboración ten como finalidade, entre outras, a posibilidade de impartir módulos profesionais incluídos en títulos de formación profesional nas instalacións das empresas, co fin de garantir que a formación se realice cos equipamentos máis actuais, así como a actualización profesional. Esta colaboración formalizarase mediante convenio.

5º. Que o Real decreto 1529/2012, do 8 de novembro, polo que se desenvolve o contrato para a formación e a aprendizaxe e se establecen as bases da formación profesional dual, pretende crear as

bases para a implantación progresiva da formación profesional dual en España, entendida como o conxunto de accións e iniciativas formativas que teñen por obxecto a cualificación profesional das persoas, combinando os procesos de ensino e aprendizaxe na empresa e no centro de formación, propiciando unha participación máis activa da empresa no propio proceso formativo do alumnado e, daquela, permitir que estas coñezan de xeito máis próximo a formación que reciben, cada vez máis adaptada ás demandas dos sectores produtivos e ás necesidades específicas das empresas. Neste sentido, a empresa e o centro de formación profesional estreitan os seus vínculos, unen esforzos e favorecen unha maior inserción do alumnado no mundo laboral durante o período de formación.

Así mesmo, establece que terán a consideración de formación profesional dual os proxectos desenvolvidos no ámbito do sistema educativo, coa coparticipación dos centros educativos e das empresas, cando non medie un contrato para a formación e a aprendizaxe. Estes proxectos formalizaranse a través dun convenio entre a Consellería de Cultura, Educación e Ordenación Universitaria e a empresa colaboradora.

6º. Que, as empresas Lonza Biologics Porriño S.L. e CZ Veterinaria S.A, en adiante “as empresas asinantes”, están dispostas a participar no proxecto de implantación da formación profesional dual en Galicia, acolléndose á modalidade regulada no artigo 3.1, alínea b), do Real decreto 1529/2012 - formación coa participación da empresa-, na que esta facilita aos centros de formación os espazos, as instalacións ou as persoas expertas para impartir total ou parcialmente determinados módulos profesionais ou módulos formativos.

O alumnado participante será beneficiario de bolsas, non terá en ningún caso vinculación laboral coas entidades asinantes e non poderá establecerse entre estas e aquel ningunha relación contractual, nin sequera baixo as modalidades de contrato en prácticas ou para a formación e a aprendizaxe, previsto no artigo 11 do Real decreto legislativo 2/2015, do 23 de outubro, polo que se aproba o texto refundido da Lei do estatuto dos traballadores, polo que o alumnado acollido a este réxime de bolsas queda absolutamente excluído da lexislación laboral.

7º. Que o obxecto do presente convenio é establecer as condicións de colaboración entre as empresas asinantes para a implantación dun proxecto experimental de formación profesional dual na Comunidade Autónoma de Galicia. Esta formación profesional dual combinará os procesos de

ensino e aprendizaxe nas instalacións das empresas asinantes e no centro educativo CIFP Manuel Antonio.

En consecuencia, estes organismos acordan subscribir este convenio, con base nas seguintes,

CLÁUSULAS

Primeira. Este proxecto de formación profesional dual, que é de carácter experimental, ten as seguintes características:

- a. Toma como referencia as ensinanzas do ciclo formativo de grao superior reguladas no Real decreto 832/2014, de 3 de outubro, polo que se establece o título de técnico superior en Fabricación de Produtos Farmacéuticos, Biotecnolóxicos e Afíns e se fixan a súas ensinanzas mínimas.
- b. Terá como duración desde o 15 de setembro 2016 ata o 15 setembro de 2018.
- c. A formación impartirase de xeito compartido entre o centro educativo e a empresa asinante, garantindo a adquisición dos resultados de aprendizaxe establecidos no título do ciclo formativo de Fabricación de Produtos Farmacéuticos, Biotecnolóxicos e Afíns e a obtención do título correspondente.
- d. Ademais, atendendo ás características das empresas, o segundo ano de vixencia deste proxecto dedicárase un 5 % do tempo de estadía do alumnado na empresa á formación complementaria á establecida, para reforzar a formación do alumnado e mellorar a súa empregabilidade.

Segunda. As concrecións deste proxecto experimental de formación profesional dual para o ciclo formativo de Fabricación de Produtos Farmacéuticos, Biotecnolóxicos e Afíns (distribución da formación curricular do ciclo formativo, distribución global do proxecto, temporalización dos módulos profesionais) están recollidas no anexo deste convenio.

Terceira. As empresas asinantes comprométese a acoller nas súas instalacións un mínimo de 12 alumnos e alumnas para este proxecto experimental de formación profesional dual, coa distribución

de prazas do anexo. Este alumnado deberá cumprir os requisitos de admisión establecidos na orde da Consellería de Cultura, Educación e Ordenación Universitaria que autorice este proxecto experimental de formación profesional dual.

As empresas asinantes colaborarán coa Consellería de Cultura, Educación e Ordenación Universitaria na selección do alumnado solicitante que cumpra os requisitos de admisión. Para tal fin, poderán realizarse entrevistas psicoprofesionais e probas de coñecementos que permitan identificar a idoneidade dos/das candidatos/as en relación co perfil profesional que adquirirá o alumnado na empresa ao longo do proxecto. As empresas comunicarán ao alumnado os criterios e os procedementos utilizados na selección con anterioridade á súa realización.

Estas actuacións serán realizadas por persoal das empresas xunto cunha persoa representante do centro educativo, de xeito que a selección garanta cubrir o número mínimo de prazas que a empresa se compromete a acoller nas súas instalacións.

Cuarta. As empresas asinantes comprométense a financiar o proxecto de formación regulado neste convenio, mediante o establecemento dun sistema de bolsas dirixido ao alumnado participante.

Este réxime de bolsas estará suxeito ás seguintes especificidades:

- a. As empresas asinantes achegarán a cada alumno ou alumna do proxecto, en períodos mensuais con carácter irrevogable, unha bolsa por un importe mínimo de 500 €, durante os meses nos que a actividade formativa e profesionalizadora se realice integramente na empresa. Tomando como referencia este importe, o resto dos meses o importe se calculará de forma proporcional ao tempo que o alumno ou alumna dedique á actividade profesionalizadora na empresa.
- b. Os alumnos e as alumnas participantes no proxecto de formación obxecto deste convenio serán incorporados ao réxime xeral da Seguridade Social. A conseguinte afiliación e/ou alta, así como a baixa no devandito réxime, produciranse a partir da data de inicio e na de cesamento do programa de formación, nos termos, nos prazos e cos efectos establecidos no regulamento xeral sobre inscrición de empresas e afiliación, altas, baixas e variacións de datos de traballadores na Seguridade Social, aprobado polo Real decreto 84/1996, do 26 de xaneiro.

- c. Para a efectividade do réxime de bolsas, as empresas colaboradoras e as persoas bolseiras deberán cumprir sempre os requisitos establecidos na normativa que regula os proxectos de formación profesional dual e neste convenio.

Quinta. No primeiro curso deste proxecto o alumnado adquirirá formación no centro educativo, de setembro a xuño, no horario lectivo que este estableza.

Sexta. No segundo curso deste proxecto o alumnado adquirirá formación no centro educativo desde o inicio do curso ata o mes de xaneiro, no horario lectivo que se estableza. A estadía do alumnado na empresa estenderase de febreiro ao 15 de setembro de 2018. Durante o período formativo na empresa, o horario da actividade formativa e profesionalizadora deberá desenvolverse dentro do marco temporal do horario laboral da empresa.

Sétima. O alumnado deste proxecto disporá dun mínimo de trinta días naturais de vacacións en cada un dos cursos de duración do proxecto. Para estes efectos computaranse, por unha parte, as vacacións escolares, establecidas para cada curso no correspondente calendario escolar, das que o alumnado se beneficie durante a súa estadía no centro educativo, e, por outra parte, os días restantes ata completar, cando menos, o mínimo establecido, que determinará a empresa no período de estadía do alumnado na empresa.

Oitava. Consonte o artigo 30.5 do Real decreto 1592/2012, do 8 de novembro, a actividade formativa na empresa e no centro educativo coordinarase mediante reunións mensuais de control nas que se fará seguimento do alumnado.

Cada unha das empresas participantes nomeará unha persoa como titor ou titora do alumno ou da alumna, que será responsable do seguimento da actividade formativa, da coordinación da actividade profesionalizadora coa actividade formativa e da comunicación co centro de formación.

Así mesmo, o centro formativo designará un profesor ou profesora, ou formador ou formadora, como titor ou titora responsable da programación e do seguimento da formación, así como da coordinación da avaliación co profesorado e/ou os titores e as titoras que interveñen. Ademais, esta persoa será a interlocutora coa empresa para o desenvolvemento do proxecto.

Novena. Establecerase unha comisión de seguimento, control e supervisión, que se reunirá cando o considere oportuno calquera das partes asinantes. Esta comisión estará constituída polos seguintes membros:

En representación da Consellería de Cultura, Educación e Ordenación Universitaria:

- A persoa titular da subdirección xeral de formación profesional ou persoa en quen delegue.
- A persoa titular da dirección do CIFP Manuel Antonio.
- O profesor titor ou a profesora titora do centro educativo.

Dúas persoas representantes das empresas asinantes.

Un funcionario ou unha funcionaria da Consellería de Cultura, Educación e Ordenación Universitaria actuará como secretario ou secretaria.

Décima. O convenio entrará en vigor na data da súa sinatura e terá vixencia ata a finalización do proxecto.

Décimo primeira. Este convenio extinguirase pola finalización do tempo convido e poderase resolver por calquera das partes, mediante denuncia dalgunha delas, que se lle deberá comunicar á outra cunha antelación mínima de quince días, baseada nalgunha das seguintes causas:

- a. Cesamento das actividades do centro docente ou da empresa.
- b. Forza maior que imposibilite o desenvolvemento das actividades programadas.
- c. Incumprimento das cláusulas establecidas neste convenio.
- d. Mutuo acordo entre o centro docente e a empresa.

Décimo segunda. A sinatura deste convenio suporá o consentimento expreso do interesado á Administración para incluír e facer públicos os datos referidos ao convenio de conformidade co artigo 15 da Lei 1/2016, do 18 de xaneiro, de transparencia e bo goberno, co artigo 8 da Lei 9/2013, do 9 de decembro (BOE do 10 de decembro), de transparencia, acceso á información pública e bo goberno, e co Decreto 126/2006, do 20 de xullo, polo que se regula o Rexistro de Convenios da Xunta de Galicia.

Décimo terceira. Este convenio de colaboración posúe carácter administrativo por razón do contido e das materias sobre as que versa, as cales, ao abeiro do disposto no artigo 4.1 e 2 do Real decreto legislativo 3/2011, do 14 de novembro, polo que se aproba o texto refundido da Lei de contratos do sector público, o exclúen do seu ámbito de aplicación, sen prexuízo da aplicación dos principios desta para resolver as lagoas ou dúbidas que a súa aplicación suscite.

Dada a natureza administrativa deste instrumento xurídico, as controversias ou cuestións litixiosas que xurdiren na súa aplicación e non puideren ser solucionadas no seo da comisión de seguimento serán resoltas pola xurisdición contencioso-administrativa.

De conformidade co disposto na Lei orgánica 15/1999, do 13 de decembro, de protección de datos de carácter persoal, e co Real decreto 1720/2007, do 21 de decembro, polo que se aproba o regulamento que desenvolve a citada lei orgánica, nin o alumnado nin a empresa que por razón das actividades formativas teñan acceso a datos de carácter persoal disporán destes con finalidade distinta á exixida polas accións formativas.

Lido este convenio, atópano conforme e asínano no lugar e na data indicados.

**O conselleiro de Cultura, Educación
e Ordenación Universitaria**

Asdo.: Román Rodríguez González

**A representante da empresa Lonza
Biologics Porriño S.L.**

**O representante da empresa CZ
Veterinaria S.A.**

Asdo.:

Asdo.:



1. ANEXO

1.1 Distribución de postos de formación por empresa e por ciclo de formación profesional básica

Empresa	Nº prazas
Lonza Biologics Porriño S.L.	8
CZ Veterinaria S.A.	4
TOTAL	12

1.2 Distribución da formación curricular do ciclo formativo

Duración do proxecto			Curso 16-17	Curso 17-18	FCT + Proxecto
Formación curricular	Centro educativo	Formación centro educativo (63 %)	827 h	433 h	-
	Empresa	Formación en empresa (37 %)	-	330 h	410 h
Total			2000 h		

FCT: formación en centros de traballo.



1.3 Temporalización dos módulos profesionais

1.3.1 Curso 2016-2017

1.3.1.1 Planificación

Curso 2016 - 2017									
Set.	Out.	Nov.	Dec.	Xan.	Feb.	Mar.	Abr.	Maio	Xuño
Formación no centro educativo									

1.3.1.2 Organización dos módulos profesionais

Código módulo	Nome módulo	Horas totais módulo	FCE	FEM
MP1387	Organización e xestión da fabricación de produtos farmacéuticos, biotecnolóxicos e afíns	80 h	80 h	-
MP1389	Operacións básicas na industria farmacéutica, biotecnolóxica e afíns	187 h	187 h	-
MP1390	Principios de biotecnoloxía	187 h	187 h	-
MP1391	Seguridade na industria farmacéutica, biotecnolóxica e afíns	107 h	107 h	-
MP1392	Áreas e servizos auxiliares na industria farmacéutica, biotecnolóxica e afíns	159 h	159 h	-
MP1398	Formación e orientación laboral	107 h	107 h	-
TOTAL		827 h	827 h	-



1.3.2 Curso 2017-2018

1.3.2.1 Planificación

Curso 2017 - 2018													
Set.	Out.	Nov.	Dec.	Xan.	Feb.	Mar.	Abr.	Maio	Xuño	Xullo	Ago.	Set.	
	Formación no centro educativo				Actividade profesionalizadora / formación na empresa								

1.3.2.2 Organización dos módulos profesionais

Código módulo	Nome módulo	Horas totais módulo	FCE	FEM
MP1399	Empresa e iniciativa emprendedora	53 h	53 h	-
MP0191	Mantemento electromecánico en industrias de proceso	133 h	60 h	73 h
MP1388	Control de calidade de produtos farmacéuticos, biotecnolóxicos e afíns	140 h	70 h	70 h
MP1393	Técnicas de produción biotecnolóxica	122 h	70 h	52 h
MP1394	Técnicas de produción farmacéutica e afíns	140 h	80 h	60 h
MP1395	Regulación e control na industria farmacéutica, biotecnolóxica e afíns	105 h	60 h	45 h
MP1396	Acondicionamento e almacenamento de produtos farmacéuticos, biotecnolóxicos e afíns	70 h	40 h	30 h
TOTAL		763 h	433 h	330 h



1.4 Adquisición, por parte do alumnado, de cualificacións e unidades de competencia

Cualificacións profesionais completas

<p>▪ Organización e control do acondicionamento de produtos farmacéuticos e afíns, QUI115_3 (Real decreto 1087/2005, do 16 de setembro), que abrangue as seguintes unidades de competencia:</p>
<p>– UC0335_3: Verificar a conformidade de materiais, equipamentos, instalacións e condicións de proceso.</p>
<p>– UC0336_3: Coordinar e controlar o acondicionamento de produtos farmacéuticos e afíns.</p>
<p>– UC0337_3: Garantir a calidade dos produtos acondicionados.</p>
<p>– UC0338_3: Cumprir e facer cumprir as normas de seguridade e ambientais do proceso farmacéutico e afíns.</p>
<p>▪ Organización e control da fabricación de produtos farmacéuticos e afíns, QUI116_3 (Real decreto 1087/2005, do 16 de setembro), que abrangue as seguintes unidades de competencia:</p>
<p>– UC0334_3: Organizar a produción de produtos farmacéuticos e afíns.</p>
<p>– UC0335_3: Verificar a conformidade de materiais, equipamentos, instalacións e condicións de proceso.</p>
<p>– UC0338_3: Cumprir e facer cumprir as normas de seguridade e ambientais do proceso farmacéutico e afíns.</p>
<p>– UC0339_3: Coordinar e controlar a fabricación de produtos farmacéuticos e afíns.</p>
<p>– UC0340_3: Garantir a calidade na transformación de produtos farmacéuticos e afíns.</p>
<p>▪ Organización e control de procesos, e realización de servizos biotecnolóxicos, QUI480_3 (Real decreto 143/2011, do 4 de febreiro), que abrangue as seguintes unidades de competencia:</p>
<p>– UC0577_3: Supervisar os sistemas de control básico.</p>
<p>– UC0578_3: Supervisar e operar cos sistemas de control avanzado e de optimización.</p>
<p>– UC1537_3: Obter e intercambiar datos biotecnolóxicos usando redes telemáticas e técnicas de bioinformática.</p>
<p>– UC1541_3: Supervisar o axeitado cumprimento das normas de seguridade e ambientais en biotecnoloxía.</p>
<p>– UC1557_3: Organizar a fabricación de produtos de base biolóxica e o desenvolvemento de servizos biotecnolóxicos.</p>
<p>– UC1558_3: Garantir a calidade do proceso de obtención de produtos e servizos biotecnolóxicos.</p>